



Uunga siunnersuut: Tikeraat ornittagaannik takornariartitsivinnillu pilersitsisarneq ingerlatsinerlu pillugit Inatsisartut inatsisaat nr. xx, xx. xxx 2016-imeersoq.

(Inuussutissarsiornermut, Suliffeqarnermut Niuernermut Nunanullu Allanut Naalackersuisoq)
(Siullermeenera)

Demokraatinut qularutissaanngilaq nunatsinnut takornariat amerlisarniarlugit pilerisaarinerup annertusarnera eqqorluinnartuusoq. Takornariat amerlippata inuiaqatigiinni aningaasat amerlanerusut kaaviiartinneqalissapput aamma taamaattumik tamatuma najukkani inuussutissarsiortut iluaqusissavai.

Matumani siunnersuummi siunertarineqarpoq Namminersorlutik Oqartussat pulaartarfinnik takornariagassanillu pilersitsinissaannut sinaakkutissat aalajangersarnissaat. Pulaarfiit takornariagassallu pilerisaarissapput takornariat allamukaratik Kalaallit Nunaannut takornariartarnissaannut.

Nunami allani misilittakkaat, ilaatigut Norgemi, Islandimi Tuluillu Nunaanni takutippaat, pulaagassat qitiusartut pilerinarluartunik ineriartortitsinermi taamaasillutillu pilerisaarinermi qitiusartut aamma misigisassanik annertusitsisartut. tamatuma saniatigut nunani taaneqartuni takuneqarsinnaasimavoq, pisortanit pigineqarlutillu ingerlanneqartut nunami alutornartuliat pulaarfiit misigisassallu namminersortut namminneq aallartitsisarnerannut ineriartortitsisartut. Pulaarfiit takornariarfiillu nunani allani iluatsilluarsimasut, tamarmik ilisarnaatigaat pulaarfiit sanarfisallu nunap immikkoortuani neqeroorutaasunut ilapittuutaasarmata. Pisuni arlalinni sullissiiviit alutorineqarlualersimapput takornarianik ornigarneqarluartarlutik. Tamatumunnga atatillugu Demokraatinut pingaaruteqarpoq erseqqissassallugu, pulaarfiit najukkami inissiiviusussami naleqarnerulersitsissammata. Pisortanit pigineqartut pulaarfiit arlaannaatigulluunniit namminersorlutik takornariartitsisartut neqeroorutigisartagaannik inagiissanngillat - tamanna unammilleqatigiinnermut innarliissaaq akuerineqarsinnaanngitsoq.

Tamatuma saniatigut pingaaruteqarpoq misissussallugu pisortat pigisaat pulaarfiit sumiiffinni tamani aaqqiinerni pitsaanerpaajussanersut - assersuutigalugumi maani Nuummi amerlasuunik misigisassanik neqerooruteqartoqareerpoq. Tamanna tunngavigalugu Nuummi pulaarfimmik pilersitsinissaq pisariaqassava? Nuumut takornariarfimmuut pulaarfimmik pilersitsineq naleqarnerulersitsissava?

Taamatullu oqareerluta Demokraatini Naalackersuisut isumaqatigaagut naatsorsuutigimmassuk pulaarfiit pissutaallutik takornariat amerlanerulerumaartut. Tamatuma pisariaqartilissavai unnuisarfiit amerlanerusut, neriniartarfinni suliaqarnerulernissaq aamma takornarianik



angallassisarnissamut neqeroorutit annertusissapput. Aamma tamatuma saniatigut pisisartut taamaasillunilu najukkami niuertarfinni kaaviiartitat annertusissapput. Tamakkulu tamarmik aningaasarsiornermut iluaqusiissapput nunami maani suliffissaqartitsiniarnermut.

Demokraatini naggataarutaasumik oqaatigissavarput iluarisimaaratsigu Naalackersuisut oqarmata siunertaasoq pulaarfiit unammilleqatigiinneq tunngavigalugu ingerlanneqassasut aamma imminnut aningaasatigut kaaviiartissasut.

Siunnersuut Inuussutissarsiornermut Ataatsimiititaliamut innersuupparput.